

AKASHVANI AIZAWL
REGIONAL NEWS BULLETIN
HEADLINES (EVENING)

Date – 24/04/2026

Time - 18:30 -18:40Hrs

- National Panchayati Raj Day pualin vawiin khan Village council 12 te hnen ah Computer set hlan a ni.
- BJP national spokesperson Pi Shazia Ilmi chuan Lok Sabha-ah hmeichhe quota zaa 33 hauhsakna, Women's Reservation Bill dodalte chuan ram mipui zatve vel an phatsan a, hmeichhiate chawisan an duh loh zia a lantir tih vawiin khan Aizawlah a sawi.
- West Bengal Assembly inthlan thawhhnihna atana campaign chuan a vanglai a thleng chho mek
- Prime Minister Narendra Modi chuan Pathianni chawhma dar 11 hian 'Mann Ki Baat' programme a hman leh dawn.

<><><>

NATIONAL PACHAYATI RAJ DAY

National Panchayati Raj Day pualin vawiin khan Village council 12 te hnen ah Computer set hlan a ni.

He ni pual hian DRDO Aizawl Conference Hall-ah hun hman a ni a, Rural Development & Administration Department Minister Prof. Lalnilawman a hmanpui a, thusawiin, ram tih hmasawna tura pawimawh ber chu khawtlang tih hmasawna a ni a, chumi atana mawhphurhna pawimawh tak chu, khawtlang inrelbawlina kaihuai tura thlanchhuah – Village Council member-te kutah a awm a ti. Kum 2047-a India ram hi ram hmasawn leh ropui, 'Vikshit Bharat' a siam a nih theih nan Village Council hi hmanraw tangkai tak an nih mek thu a sawi bawk a ni.

Prof. Lalnilawma chuan Village Council Act thar tlangzarh a nih thu tarlangin, he dan bu chhungah hian Village Council-ten thu an neihna chi hrang 21 lai tarlan a nih thu leh an mawhphurhna pawimawh tak tak pawh ziah lan a nih thu a sawi a. Village Council member-te lawmman ennawn a nih theih nan hmalakna a kal mek thu a sawi bawk.

He hunah hian Directorate of Local Administration Director Dr. Lalngura Tlau chuan rampum huapa inelna hrang hrang zing ah Kawrthar N chuan theme 5-na ” Clean and Green Award” lawmman an dawn thu a sawi a. Hmalakna hlawhtling chu Village level-ah nasa takin a inngah thu a sawi bawk. Mizoram pum ah Village council 830 a awm a, chung zing a 286 chu autonomous district area huamchung a mi an ni a, Village council te thawmthat nan village council tin ah Computer set sem chhuah mek a ni a ti.

He hun ah hian Rural Development & Administration a thawktute, I&PR ,SRRD, DRDO, Aizawl, Mizoram Village Council Association hruaitute leh Village Council thlanchhuah 12 te an tel bawk a ni.

<><><>

12TH RESULT

Mizoram Board of School Education chuan ni April ni 29, Nilaini chhun dar 12:00-ah Higher Secondary School Leaving Certificate Examinations, 2026 result tihchhuah a tum a.

HSSLC Result hi MBSE Office, Chaltlang leh MBSE Regional Office, Lunglei leh heng website - www.mbse.edu.in leh www.mbseonline.com - ah te hian en theihin a awm ang a. A mamawh tan result bu lei theihin a awm bawk ang.

<><><>

BJP

Bharatiya Janata Party (BJP) national spokesperson Pi Shazia Ilmi chuan karkaltaa Parliament-ah Congress, Samajwadi Party, TMC leh DMK-in Lok Sabha-ah hmeichhe quota zaa 33 hauhsakna, Women's Reservation Bill an dodal chuan ram mipui zatve vel an phatsan a, hmeichhiate chawisan an duh loh zia a lantir a ti.

Vawiin tlai khan BJP Mizoram buatsaihin Aizawl Press Club-ah BJP national spokeperson Pi Shazia Ilmi leh Pu Devesh Kumar, Bihar MLC, BJP Mizoram Prabhari ni bawk chuan thuthar thehdarhtute kawmin, BJP national spokeperson chuan Prime Minister Narendra Modi chuan ram rorelnaa hmeichhiate hmun pek ve chu induhsakna thil ni lovin thil nih dan tur a ni tih Chiang takin a lo sawi tawh a ti a. BJP chuan hmeichhe chawisan leh mipui rorelna tihchak kawngah a inpumpek a, hmeichhiaten an dikna chanvo an dawn ve theihna tur dodal tute chu an dolet zel dawn a ti.

Tun thla April ni 16 leh ni 17-a Parliament thutkhawmah Constitution (131st Amendment) Bill, Delimitation Bill, Union Territories Laws (Amendment) Bill sawihona chu mipui rorelna ram hmalam hun leh ram rorelnaa hmeichhiate tan a chhinchhiah thlak hle a ti a. Hetihlai hian eptu party hrang hrang- Congress, Samajwadi Party, TMC leh DMK ten Lok Sabha-ah hmeichhe quota zaa 33 hauhsakna, Women's Reservation Bill an dodal chuan ram mipui zatve vel an phatsan a, hmeichhiate chawisan an duh loh zia a lantir bawk niin a sawi a. BJP chuan eptu tangrualten zahpuiawm taka hmeichhiate dikna chanvo an dodal chu a dem hle a ni a ti.

<><><>

LUNGLEI ASHA TRAINING

World Malaria Day pualin vawiin khan Lunglei S.P Conference Hall ah Lunglei Municipal Council huamchhunga ASHA te Malaria chungchang zirtir an ni a,

Lunglei Sr.Chief Medical Officer hnuai Dist Centre For Vector Born Disease Control te buatsaih ASHA te puala Malaria chungchang zirhona hi Malaria Consultant Vanchamliana Chhange chuan a kaihruai a, Malaria laka fihlim tura hmalakna kawngah ASHA te chuan mawhphurhna sang tak an neih thu te, tlawmngai pawlte nen a thawh ho thiam a tul thu leh puitling tawh te chu zirtir an harsat thin avangin naupang lamah Malaria natna laka fihlim dan tur zirtirna pek uar a tul thu a sawi.

ASHA te puala Malaria chungchang zirhona hunah hian Dist Vector Born Disease Control hnuai thawktuten Malaria natna awmzia te, a enkawl dan leh treatment pek dan turte, Thosilen zar pawimawhna te leh Malaria natna laka fihlim tura thil pawimawh hrang hrang te an zirtir a, ASHA te chu a hretu mai nilo a, a taka midangte hnen a an thil hriatte chu hmang tangkai turin an ngen a ni.

Lunglei Municipal Council huam chhungah hian tun dinhmunah ASHA 53 awm mekin ASHA thenkhat chuan LMC Area pawn lam thingtlang khuate pawh an vil a. Dist Vector Born Disease Control Lungleia thawktute hian vawiin vek khan Lunglei khawpui chhim lam leh hmar lama zirna Inah te Malaria chungchanga zirtirna hi an pe a ni.

<><><>

ANIMAL HEALTH CAMP

Tunkar khan Animal Husbandry leh MzSRLM tangkawpin Champhai District a khaw hrang hrang-Vangchhia, Sazep, Sesih, Lianpui leh Zawlsei khuaah Free Animal Health Camp an buatsaih a, he mi hunah hian Veterinary Officer Dr. Eneth Lalhuthangi leh a staff ten ran chi hrang hrang Vawk 160, Ar 460, Ui 13 leh Sial 35 damdawi semin enkawl na an pe a ni.

Champhai District AH & Vety. Department pawhin Khuangleng, Buang, Hmunhmeltha leh Zote ah Free Animal Health Camp bakah ran natna chungchang inzirtirna a buatsaih leh a, Zote khuaah hian Ar 1374, Vawk 160, Ui 3 leh Zawhte 1 enkawlin Hmunhmeltha ah ran chi hrang hrang 300 chuang enkawl na an pe bawk.

<><><>

LUNGLEI WAR MEMORIAL

Lunglei khawpui laili taka awm, indonaa sipai martarte hriat rengna lungphun, War Memorial chei that thar chu vawiin khan Assam Regiment 3 Corps General Officer Commanding (GOC) Lt Gen. Abhijit S. Pendharkar ann ralkhat atangin internet kaltlangin a hawng.

War Memorial hawnnaah hian 3 Corps GOC ai awhin 23 Sector Assam Rifles Commander, Deputy Inspector General Brig. Puspendar Sorayan chuan a hmunah War Memorial khuhna puanzar pawt hawngin, Corps Commander ai awhin ram tana nun hlantu sipai huaisen martarte zahna leh hriat rengna pangpar a dah nghal a. War Memorial Lungleia hming chuang sipai huaisen martarte hriat reng nan leh anmahni zahna lantir nan hian Lunglei Municipal Council (LMC) Chairman Pu Lalzuithanga, District Sainik Welfare & Resettlement Officer Maj. Rebecca L. Chhakchhuak (Retd), Mizoram Ex-Services League (MESL) hruaitute leh martar chhungte'n pangpar an dah bawk.

Sipai martarte puala pangpar dah a nih hnu hian anmahni hriat reng nan leh sun nan minit hnih chhung ngawi renga din a ni a. Sipai tih dana tawtawrawt ham leh silai nen zahna chibai bukna hun hman a ni bawk.

War Memorial Lunglei hi Lunglei khawpui laili, Chanmari veng chhunga awm a ni a. Indopui Pahnihnaa ram tana nun hlantu sipai martar mi 103 te leh hel beihnaa martar mi 5 te hming chuanna leh anmahni hriat rengna lungphun awmin, Lunglei DSW&RO office-in an enkawl a ni.

<><><>

RTI

Mizorama RTI lama thuneitusang ber, Mizoram Information Commission in MUHCS chungchanga Mizoram State Healthcare Society (MSHCS) leh Synod Hospital inremna RTI Act hmanga diltu hnena pe chhuak tura a hriattirna chu MSHCS-in Gauhati High Court-ah a khing a, Mizoram chanchinah state sorkar hnuai ve ve court-a an inkhin hmasak ber tum nia hriat a ni.

Mizoram Information Commission full bench chuan Advocate Pu J Malsawmzuala'n RTI hmanga Mizoram Health Care Society hnena MUHCS chungchanga Synod Hospital, Durtlang nena an inremna an ziah copy leh detail pricing a dil, an pek theih loh avanga zualko na chungchangah tun thla April ni 9 khan hearing neiin, a thil dil chu April ni 17 hmaa pe turin MSHCS SPIO chu thu a pe a ni. Mizoram HealthCare Society chuan he thupek hi ngaihtuah nawn leh turin April ni 20 khan Information Commission a ngen a, hetihlai hian Information Commission chuan RTI danah ngaihtuah nawn leh theihna a awm loh thuin a chhang a. Mizoram Health Care Society chuan Gauhati High Court-ah motion pu lutin MIC-in MSHCS leh Synod Hospital inremna pe tura a hriattirna chu stay a dil a, April ni 22, Nilaini khan

Gauhati High Court- Aizawl Bench-ah ngaihtuah niin, stay a dilna hi a pawmsak a, thlaleh May ni 18 khian High court chuan a ngaihtuah leh dawn a ni.

Hemi chungchangah hian Akashvani News Aizawl chuan MUHCS a be pawp thei lova, Mizoram Information Commission lam chuan High court atangin engmah an la dawng rih lo tih Akashvani News Aizawl an hrilh a, RTI thehluttu Advocate Pu J Malsawmzuala chuan MUHCS chungchanga sorkar leh Synod hospital inremna piah lamah Mizoram leh Mizoram pawn damdawi in te nena an inremna te pawh sorkarin a thup tlat a, MLA te pawhin Assembly House-ah an zawt chhuak thei lo a ti a. Langtlang taka MUHCS kalpui chu mipui zawng zawng tan a that ber laiin, langtlang lo tura sorkarin a chakna zawng zawng hmanga High Court hial a thleng duh chu vanduaithlak a tih thu a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

ELECTION

West Bengal Assembly inthlan thawhnhina atana campaign chuan a vanglai a thleng chho mek a. Tun thla ni 29 ah vote thlak tur niin Assembly seat 142 ah inthlan a ni dawn a. Vawiin khan Prime minister leh BJP senior leader Narendra Modia chaun Panihati ah an party candidate te tan a campaign a. Prime Minister Modia chuan inthlan thawhkhatnaa vote thlak zat sang tak chuan mipuiten inthlak an duhzia a tilang a ti a. Thlaleh ni 4 a vote chhiar zawh anih hun chuan West Bengal chu eirukna, phubak lak hmang hruaitute, hmeichhiate chung a hleilenna, dan kalha pmlut leh hna vanga lak ata an zalen tawh ang a ti.

Vawiin vek khan Trinamool Congress hruaitu Mamata Banerjee chuan Bhabanipur ah thu a sawi a. TMC General Secretary Abhishek Banerjee pawhin Howrah leh South 24 Parganas ah te vantlang inkhawm a huaihawt bawk a ni.

<><><>

SC

Sawrkar laipui chuan kum 2025-26 chhungin Schedule Caste zirlai nuai 75 chuangte hnenah an zirna puitu atan cheng vaibelchhe 7981 a sem. Union Minister for Social Justice and Empowerment Dr.Virendra Kumar chaun sawrkarin mitin huapzo hmasawna pe turin theihtawp a chhuah thu leh tupawhin an chanvo diktak an chan theih nan hma alak thu a sawi a ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 133-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>